



L'importansa del diaèto



Nadàe 2014 in Casa Novello. *Da sin.*, Maurizia Cagnato, Paola Martello e, *ultimo a dx*, co i ociài, mons. Giuseppe Bonato; *in fondo*, al centro de la foto, la segretaria Giovanna Rigon.

La nostra brava Presidente, Maurizia Cagnato, ga mosso le pedine juste par far sì che, propio 'tel mese de le rose e de la Mama celeste, spanisse i bòcoli pi parfumà del nostro jardin: dó Eventi che, 'te l'Ano Acadèmico 'pena passà, ga impressio 'ncor pi le atività del Cenàcolo e fato capir mèjo quanto importante xe mantegner vivo el nostro bel diaèto, rancuràndolo co amore insieme a tuto quello che xe stà le nostre tradission e la cultura de i nostri veci.

L'11 de majo, la Biblioteca "La Vigna" ga vudo l'onore de 'ver ospiti i preti ansiani de Casa Novello, na Residenza Sanitaria Assistensia che da ani là ghe stà drio a i preti che no pol pi (par l'età, le magagne o altro) continuo co l'inpegno in paròchia o co l'insegnamento; a sti òmeni de Dio che ga l'ànema piena de esperiense de vita (tante 'olte i xe stà par ani in tera de mission), no ghe ga parso vèro poder riciapar in man la pena par scrivere i versi che i rancurava 'te on cantonsin del core, riciapando el gusto de la lengua del late che paréa desmentegà. Propio Casa Novello ga vossudo sponsorizare la publicassion del libreto "Ricordi d'infanzia", pensà da la Presidente Cagnato e realizà co de i raconti in diaèto, butà zo da i nostri Cenacoini.

Grassie a monsignor Giuseppe Bonato, Direttore de Casa Novello, e a la dotoressa Sabrina Germi, la dirigensa del Cenàcolo ga possudo fare sinque incontri mensili a tema, svilupàndoi co i ospiti e fasendo sì de condividere ogni

emossion, portàndoli a scrivere riflession e poesie.

La roba pi toga la xe stà, par mi, quella de catare on prete-poeta, sentio senpre e solo par telèfono, che co mi el gavéa vinto ani prima on premio a Roma: don Antonio Veronese de Molvena, trasferio da poco in Casa Novello. El mondo el xe dal bon picinin!

Ùltima emossion granda, quella che ga visto, el 18 del stesso mese, na bèa sgnarà de bocia de le scole primarie de Grancona, San German e Sossan, in pieñar de vita la Sala Brusarosco-Zaccaria de "La Vigna": insieme a 'e so maestre i ne ga conprà el core, scoltando inmagà

calcossa che serti autori del Cenàcolo ga leto dal libreto vudo poco prima in regalo, ideà da la nostra Maurizia Cagnato e publicà da la Editrice Veneta de Vicenza: "Ciacolando in Diaeto" - alla scoperta delle tradizioni e della cultura passata del nostro territorio.

A la fine de le letture, se ghe ga fato a i tusi na picola intervista (senza voto, la Maurissia ga rassicurà i bocia, che i la vardava co i ocioni spaentà...), domandàndoghe se 'ncora la so fameja parlava in diaèto, se ghe jera on piato tradissionè che casa sua se cusinava, se i capiva l'importansa che 'l dialeto fusse 'ncora mantegnù vivo, ecètera. A so' restà conquistà da le paròe de on toseto de quinta, belo come 'l sole e sgajo ca no sò: a la domanda so 'l parché saria brutto ca morisse 'l diaèto, el ga risposto pronto che, se la nostra lengua del late 'ndasesse persa, moriria na parte importante de la nostra cultura co le so tradission e, soratuto, na lengua che la lo fa anca ridare... La Presidente ghe ga 'lora domandà de dire 'l so nome e da indove che 'l vien. El piccolo (dal nome stranbo, tipo arabo) el ga risposto anca staòlta, in 'talian diria parfeto, che 'l riva da la Siria.

Che bel esenpio de integrassion! Vardèli i bocia de i nostri paesi, come che i se la gode 'tel giardin de "La Vigna", spetando el pulmin che li riporta scola!

Grassie, Cenàcolo, grassie, Maurissia Presidente, e grassie a tute le altre tose che ga portà 'vanti el Consiglio: mi, go za nostalgia e, 'lora, ciapo in man on libretto, lèso e speto che riva otobre...

Ines Scarparolo

Le tre classi nel giardin de la Biblioteca de "La Vigna", drio spetare el pulmin; *a sin.*, incucià rente i tusi Paola Martello davanti a Giovanna Rigon; *a destra* in pie, rente la Diretrice del Comprensivo, la Presidente Maurizia Cagnato.

